



Mahein nia Lian No. 28, 19 Janeiru 2012

Konsellu Superiór Defeza no Siguransa Timor-Leste

Introdusaun

Repúblika Demokrátika Timor-Leste (RDTL) nia Konstituisaun nudar baze fundamentu konstitusional ida atu hahoris no harii lei no instituisaun ka orgaun estadu nian. Prezidente Repúblika iha nia kualidade nudar Xefe Estadu no Komadante Supremu Forsa Armada nian pratikamente presiza tulun husi orgaun sira seluk. Iha nia kualidade nudar Xefe Estadu no Komadante Supremu Forsa Armada nian, Parlamentu Nasional iha tinan 2005 dekreta konabá lei Konsellu Superiór Defeza no Seguransa nudar orgaun konsulta Prezidente Repúblika nian ba materia defeza no siguransa.¹

Knáar Konsellu Superiór Defeza no Siguransa nudar hatur iha Konstituisaun Repúblika Demokrátika Timor-Leste Artigu 148 konabá Konsellu Superiór ba Defeza no Siguransa nudar orgaun konsulta Prezidenti Republika nian ba asuntu defeza no siguransa.² Instituisaun ida ne'e nia isin indispensável ba Prezidente Repúblika atu hala'o ninia kompeténsia konstitusional sira, hanesan garante ba independénsia, ba unidade estadu nian no mós ba Komandante Supremu Forsas Armadas nian.³

Iha Mahein nian Lian No. 26 ida ne'e, Fundasaun Mahein (FM) halo análiza konabá Konsellu Superiór Defeza no Siguransa nian knáar nudar orgaun konsulta Prezidenti Repúblika nian ba materia defeza no siguransa, ne'e sorin ida. Iha sorin seluk, hare mos Konsellu Superiór Defeza no Siguransa ninia kompozisaun, kompetensia no desizaun Konsellu Superiór Defeza no Seguransa nian, ikus liu ramata ho dezafiu no frakeza saida mak Konsellu Superiór Defeza no Siguransa infrenta iha nia kompetensia.

Kompozisaun Konsellu Superiór Defeza no Siguransa

Konstituisaun Repúblika Demokrátika Timor-Leste, Artigu 148 Númeru 3 nudar forsa juridika fo mandatu konstitusional ba Konsellu Superiór Defeza no Siguransa atu hala'o nia knáar. Kompozisaun ba konsellu Superiór Defeza no Siguransa kompostu husi Prezidenti Repúblika; Prezidenti Parlamentu Nasional; Premeiru Ministru; Ministru ho Sekretáriu de Estadu responsavel ba área defeza, justisa, interior no negósius estranjeirus; Representante na'in tolu husi Parlamentu Nasionál; Xefe Estadu-Maiór Jenerál Forsas Armadas nian, ka sé de'it mak

¹ Lei Organika Konsellu Superiór Defeza no Seguransa, Tinan 2005.

² Konstituisaun Repúblika Demokrátika Timor-Leste, Artigu 148 Númeru 1.

³ Lei Organika Konsellu Superiór Defeza no Seguransa, Tinan 2005.

dezempeña funsaun ida ne'e; Komandante-Jerál PNTL nian; Responsavel nasional ba Seguransa Estadu nian; Sidadaun na'in rua nomeadu husi Prezidente da Repúblika no Konsellu Superiór Defeza no Siguransa prezide husi Prezidente Repúblika.⁴

Membru Konsellu Superiór Defeza no Siguransa Atual

Naran	Kategoria
Dr. Jose Ramos Horta	Prezidente Repúblika
Fernando "La Sama" de Araujo	Prezidente Parlamentu Nasional
Kay Rala Xanana Gusmao	Premeiru Ministru
Zacarias Albano da Costa	Ministru Negosiu Estranjeiru
Lucia Maria Lobato	Ministra Justisa
Julio Tomas Pinto	Sekretariu Estadu Defeza
Francisco Guterres	Sekretariu Estadu Seguransa
Lere Anan Timur	Komadante F-FDTL
Longuinhos Monteiro	Komadante PNTL
Roque Rodrigues	Sidadaun ne'ebé nomea husi Prezidente Repúblika
Alcino Barris	Sidadaun ne'ebé nomea husi Prezidente Repúblika
David Ximenes	Nomea husi Parlamentu Nasional
Fernanda Borges	Nomea husi Parlamentu Nasional
Cirilio Cristovão	Diretor Servisu Nasional Intelejensia ⁵

Fontes: <http://www.presidencia.tl/por/scdmem.html>, Fundasaun Mahein (FM) halo mudafikasaun, 08 Novembru 2011.

Kompetensia Konsellu Superiór Defeza no Siguransa

Lei Organika Konsellu Superiór Defeza no Siguransa hatur nia kompetensia iha Artigu 3 nudar hakerek katak Kompete ba Konsellu Superiór Defeza ho Siguransa atu fó konsellu ba Prezidente Repúblika; Iha matéria política defeza ho siguransa nian; Halo análise konabá lejizlasaun no implementasaun ba lei relasionadu ho organizasaun, funsionamentu no disiplina forsas armadas nian, polísia nian no forsa siguransa sira seluk; Iha prosesu ba konkluziun akordu internasionál sira nian iha área defeza ho siguransa; halo desizaun konabá deklarasaun ba funu no halo dame; Iha desizaun konabá deklarasaun ba estadu de sítiu ka estadu de emergjensia. Nune'e halo desizaun konabá proposta ba nomeasaun ka ezonerasaun Xefe Estadu-Maiór Jenerál Forsas Armadas nian no Vise-Xefe Estadu-Maiór Jenerál Forsas Armadas nian no halo desizaun konabá proposta nomeasaun no ezonerasaun Xefe Estadu-Maiór husi ramu sira seluk Forsas Armadas nian. Inklui halo desizaun konabá asuntu sira seluk relasionadu ho defeza ho siguransa ne'ebé Prezidente Repúblika apresenta ba nia ka

⁴ Lei Organika Konsellu Superiór Defeza no Seguransa, Kapitulo I, Artigu 2.

⁵ Fontes Jose Antonio. Casa Militar – Prezidencia Repúblika. Segunda, 09 Janeiro 2012. Maibe iha website Prezidencia Repúblika nian seidak halo aktualizasaun ba dados konabá membru Konsellu Superiór Defeza no Seguransa.

aprezentadu husi kualkér membru sira seluk. Kompete mós ba Konsellu Superiór Defeza ho Seguransa atu aprova no modifika ninia rejimentu internu.⁶ Maibé konsellu ne'ebé membru Konsellu Superiór Defeza no Siguransa fo nudar sira nia kompetensia depende ba Prezidente Repúblika bele tuir ka la halo tuir tamba Prezidente Repúblika iha nia direitu perogrativu atu toma desizaun.⁷ Sira nia papel atu fo akonsellamentu ka input ba Prezidente Repúblika ba área defeza no siguransa conforme sira nia kapasidade no vizaun atu rekomenda ba Prezidente Repúblika. Ho nune'e reuniaun Konsellu Superiór Defeza no Siguransa hakruk ba nia regulamentu, no desizaun saida deit segredu no la nakloke ba públiku. No reuniaun ne'e bazeia ezijensia situasaun interna ka eksterna ne'ebé membru Konsellu Superiór Defeza no Siguransa propoin ka Prezidente Repúblika bele konvoka, hodi análiza no deskute.⁸

1. Dezafiu ka Frakeza ba Konsellu Superiór Defeza no Siguransa

Orgaun prinsipal ida hanesan orgaun konsulta Prezidente Repúblika ba asuntu defeza no seguransa ho soberania.⁹ Konsellu Superiór Defeza ho Seguransa reúne ordináriamente fulan tolu dala ida, no extraordináriamente bainhira Prezidente Repúblika konvoka reuniaun ne'e.¹⁰ Maibé lala'ok Konsellu Superiór Defeza no Siguransa durante ne'e iha nia enkontru, tuir fontes informasaun FM nian katak pratikamente iha enkontru balu la seriu atu debate no la iha ajenda enkontru ne'ebé klaru iha Konsellu Superiór Defeza no Siguransa nia reuniaun inklui la iha minutos ka ata ba reuniaun nivel altu ida ne'e.¹¹ Maibe husi fontes seluk katak durante enkontru Konsellu Superiór Defeza no Siguransa enkontru la'o tuir ajenda no iha ataka minutos ba enkontru Konsellu Superiór Defeza no Siguransa.¹²

FM hakfodak ho frakeza ida ne'e ne'ebé bele lori dezafiu ba estadu Timor-Leste. FM sita ba situasaun interna Timor-Leste, hanesan kazu “Ninja” iha Distritu Covalima PNTL no F-FDTL halo operasaun iha tinan 2010 no operasaun 88 iha Subdistritu Queleqai Distritu Baucau tinan 2011¹³. Hare ba volume konfliktu la merese atu halo operasaun ne'ebé boot maibe forsa PNTL no F-FDTL tenki halo operasaun, tamba frakeza Konsellu Superiór Defeza no Siguransa nian ne'ebé la iha vontade politika atu diskute antes halo desizaun no lider desizor la uza Konsellu Superiór Defeza no Siguransa hodi diskute wainhira kazu aktual ruma akontese. Impaktu husi desijzaun ne'e hamosu violasaun Direitus Humanus no asaun iregularidade sira seluk, finansiamentu ba operasaun ho gastu ne'ebé boot ba lojistika, kombustivel, nsst.

Iha sorin seluk, lamentasaun comunidade ba aplikasaun “Estadu de Sitiu” ne'ebé Polisia Distritu Baucau halo rasik iha Baucau Vila ne'ebé limita movimentu populasaun nian iha tempu kalan

⁶ Lei Organika Konsellu Superiór Defeza no Seguransa, Kapítulu II, Artigu 3 Númeru 2.

⁷ Entrevista ho David Dias Ximenes. Membru Konsellu Superiór Defeza no Seguransa. Representante husi Parlamento Nasional. Kuarta, 23 Novembru 2011

⁸ Entrevista ho David Dias Ximenes. Membru Konsellu Superiór Defeza no Seguransa. Representante husi Parlamento Nasional. Kuarta, 23 Novembru 2011

⁹ Lei Organika Konsellu Superiór Defeza no Seguransa, Kapítulu I, Artigu 1.

¹⁰ Lei Organika Konsellu Superiór Defeza no Seguransa. Kapítulu III, Artigu 5, Númeru 1.

¹¹ Fontes Entrevista Fundasaun Mahein (FM). Sesta, 28 Outobru 2011.

¹² Fontes informasaun husi Casa Militar – Prezidencia Repúblika. Segunda, 09 Janeiro 2012.

¹³ Mahein Nia Lian no. 24, 28 Outobru 2011. Paj. 1 no 3.

iha fulan Agustu 2011.¹⁴ Nune'e mos iha Subdistritu Queleqai Polisia limita mos movimentu populasaun nian ne'ebé aplika iha fulan Maiu 2011 relaciona konfliktu ne'ebé akontese no mosu operasaun 88 iha subdistritu refere. Maibé tuir publikasaun media katak polisia nega aplikasaun estadu de situ.¹⁵ Ironiku liu tan PNTL nudar instituisaun implementador Lei no Ordem uza liafuan estadu de situ hodi hatauk comunidade, ne'e sorin ida. Iha sorin seluk, PNTL hato'o informasaun ne'ebé la tuir ordem konstituisional haruka. Tamba ne'e Ministeriu Defeza no Siguransa tenki toma atensaun ba aktu ida ne'e, ne'ebé la eduka comunidade konabá aplikasaun lei.

Pratikamente aplikasaun estadu de situ no estadu de emerjensia, iha Konstituisaun Repúblika Demokrátika Timor-Leste, artigu 25 kolia konaba estadu exesaun nune'e mos artigu 85 Konstituisaun-RDTL hatete deklarasaun estadu de situ no estadu de emerjensia, Prezidente Repúblika deit mak bele deklarara ho Parlamentu Nasional nia autorizasaun, rona tiha Konsellu Estadu no Konsellu Superiór ba Defeza no Siguransa¹⁶. FM foti nudar exemplu, atentadu 11 Feveireu 2008 husi grupu Alfredo Reinaldo no Gastão Salsinha hasoru Xefe Estadu no Xefe Governu, atentadu ne'ebé ameasa ba estadu, comunidade moris iha instabilidade nia laran, praktikamente estadu tenki ezekuta ordem konstituisional hodi deklarara estadu de situ, ne'ebé momentu neba Prezidenti Repúblika Interinu Vicente Guterres mak deklarara hafoin husu Parlamentu Nasional nia autorizasaun no rona tiha Konsellu Estadu no Konsellu Superiór Defeza no Siguransa.

Kazu seluk ne'ebé akontese iha fronteira Oekusse, TNI (Tentara Nasional Indonesia) tiru comunidade Naktuka-Oekuse ne'ebé hala'o negosiu ilegal hakat fronteira.¹⁷ TNI sobu comunidade nia uma no edefisiu Ministeriu Agrikultura nian iha Naktuka-Oekuse iha tinan 2010 inklui baku sidadaun Timor-Leste iha Naktuka-Oekuse.¹⁸ Tuir gravasaun FM nian katak kazu ne'ebé akontese iha fronteira kontinua akontese, FM duvida ba serbisu Konsellu Superiór Defeza no Siguransa nian ne'ebé hatur iha nia Lei Organika rasik nudar hakerek iha Kapitulu II artigu 3 konaba kompetensia Konsellu Superiór Defeza no Seguransa nian. Tamba sa kontinua akontese? Karik akontese tamba Konsellu Superiór Defeza no Siguransa la seriu hare asuntu refere no la halo kompetensia nudar orgaun konsulta no kompetensia foti desizaun ba asuntu defeza no siguransa inklui soberania estadu nian.

2. Lisaun ba Konsellu Superiór Defeza no Siguransa nian

Artigu 3 numeru 1 alinea a to'o h lei organika Konsellu Superiór Defeza no Seguransa nian nudar forsa juridika ba kompetensia Konsellu Superiór Defeza no Siguransa atu foti desizaun konabá asuntu defeza no siguransa inklui asuntu ne'ebé iha Konsellu Superiór Defeza no Siguransa nia responsabilidade.

¹⁴ <http://timorhauniandoben.blogspot.com/2011/08/oknum-polisia-halo-torturasaun-ba.html>

¹⁵ <http://suara-timor-lorosae.com/berita-4237-pntl-quelicai-nega-aplika-estadu-desitiu.html>

¹⁶ Konstituisaun Repúblika Demokrátika Timor-Leste, artigu 85, alinea g.

¹⁷ Jornal Suara Timor Lorosa'e. Segunda, 7 Novembru 2011. Pj 15.

¹⁸ Jornal Independente. Kinta, 10 Novembru 2011.

Konsellu Superiór Defeza no Siguransa kompetensia boot atu disidi distinu estadu Timor-Leste maibe dezafiu boot ba nia serbisu ne'ebé fornese desizaun no análiza ba soberani estadu Timor-Leste. Maske autor prinsipal iha kompozisaun Konsellu Superiór Defeza no Siguransa hetan estatutu preveleizu ida.

Tamba ne'e lisaun ba Konsellu Superiór Defeza no Siguransa mak tuir mai ne'e:

- Presiza fo atensaun ba serbisu sekretariadu Konsellu Superiór Defeza no Siguransa nian ne'ebé konstitui iha Gabinete Departamentu Apoiu Xefe Casa Civil nian ne'ebé fo apoiu ba Konsellu Superiór Defeza no Siguransa nian serbisu, konabá preparasaun ba reuniaun, agenda reuniaun no notulensia.
- Konsellu Superiór Defeza no Siguransa periodikamente presiza avalia bebeik situasaun rai laran no ameasa eksterna saida mak ameasa ba Timor-Leste hodi informa ba instituisaun sira relevente atu nune'e la bele mosu informasaun sira ne'ebé politizadu.
- Konsellu Superiór Defeza no Siguransa tenki halo nia papel analiza fenomena ka situasaun aktual sira ne'ebé akontese iha rai laran relasiona seguransa interna nian atu nune'e polisia la bele viola fali ordem konstituisional seluk, hanesan polisia distritu Baucau halo rasik estadu de situu ka emerjensia hodi impede movimentu comunidade nian, ne'ebé la tuir ordem konstituisional.
- Konsellu Superiór Defeza no Siguransa presiza avalia fila fali serbisu ne'ebé alkansa ona no serbisu ne'ebé seidak konklui. Hanesan kazu Naktuka ne'ebé to'o agora seidak iha nia finalidade, comunidade sai vitima, tamba deit la iha boa vontade serbisu atu rezolve problema refere.

Konkluzan

Konsellu Superiór Defeza no Siguransa nudar orgaun konsulta Prezidente Repúblika ba materia defeza no seguransa ne'ebé konstitui iha konstituisaun RDTL artigu 148. Tamba ne'e Parlamentu Nasional iha tinan 2005 dekreta lei Konsellu Superiór Defeza no Siguransa nudar mandatu prinsipais ida hodi fo konsellu ba Prezidente da Repúblika.

Konsellu Superiór Defeza no Siguransa iha nia kualidade análiza konabá lejjlazaun no implementasaun ba lei relasionadu ho organizasaun, funsionamentu no disiplina forsas armadas nian, polisia nian no forsa seguransa sira seluk. Nune'e mos halo análiza fenomena ka situasaun rai laran no eksterna inklui akordu internasional sira ne'ebé relasaun ho asuntu defeza no seguransa. Pratikamente nudar orgaun konsulta Prezidente Repúblika nian nudar Xefe Estadu no Komandante Supremu Forsa Armada nian.

Iha ambitu ida ne'e, FM hakfodak ho serbisu ne'ebé Konsellu Superiór Defeza no Siguransa alkansa ona, sei iha risku dezastre nia laran. Tamba la iha boa vontade serbisu ne'ebé diak, ikus mai fo rejultadu ne'ebé ladun diak ba comunidade, hanesan kazu ne'ebé FM foti iha alinea kotuk. Tamba ne'e Konsellu Superiór Defeza no Siguransa presiza avalia fila fali serbisu ne'ebé durante ne'e hala'o, iha ambitu nudar orgaun konsulta Prezidente Repúblika nian ba maetria defeza no siguransa ho soberania.

Nudar orgaun prinsipal estadu nian ne'ebé halo análiza no fó konsellu ba Prezidente Repúblika presiza rekursu tekniku iha sekretariadu Konsellu Superiór Defeza no Seguransa ne'ebé fo apoiu serbisu Konsellu Superiór Defeza no Siguransa. Atu nune'e la bele impede Konsellu Superiór Defeza no siguransa nian funsionamentu. FM nia hare ida ne'e sai hanesan dazefiu ida ba Konsellu Superiór Defeza no Siguransa nian funsionamentu.

Referensia:**Dokumentu:**

Konstituisaun Repúblika Demokrátika Timor-Leste
Lei Organika Konsellu Superiór Defeza no Siguransa, Tinan 2005.
Relatoriu Mahein Nia Lian no. 24, 28 Outobru 2011

Intervista

Intervista ho David Dias Ximenes. Membro Konsellu Superiór Defeza no Siguransa.
Reprezentante husi Parlamentu Nasional. Kuarta, 23 Novembru 2011

Fontes Jose Antonio. Casa Militar – Prezidencia Repúblika. Segunda, 09 Janeiro 2012.

Fontes Intervista Fundasaun Mahein (FM). Sesta, 28 Outobru 2011.

Jornal

Jornal Suara Timor Lorosa'e. segunda, 7 Novembru 2011.

Jornal Independente. Kinta, 10 Novembru 2011.

Links

<http://www.presidencia.tl/por/scdmem.html>

<http://suara-timor-lorosae.com/berita-4237-pntl-quelicai-nega-aplika-estadu-desitiu.html>

<http://timorhauniandoben.blogspot.com/2011/08/oknum-polisia-halo-torturasaun-ba.html>